



მემორანდუმი

საქართველოს იუსტიციის სამინისტროს

და

ქალაქ ფოთის მუნიციპალიტეტის მერიის

ურთიერთთანამშრომლობის შესახებ

ქ.ფოთი

21 სექტემბერი, 2021 წ.

ერთი მხრივ, საქართველოს იუსტიციის სამინისტრო (შემდგომ - „სამინისტრო“), წარმოდგენილი მინისტრის, რატი ბრეგაძის სახით და მეორე მხრივ, ქალაქ ფოთის მუნიციპალიტეტის მერია (შემდგომ - „მერია“), წარმოდგენილი ფოთის მუნიციპალიტეტის მერის, გოჩა კურდღელიას სახით, ცალ-ცალკე „მხარედ“, ხოლო ერთობლივად „მხარეებად“ წოდებულნი ადასტურებენ დანაშაულის პრევენციის, მსჯავრდებულთა რესოციალიზაცია-რეაბილიტაციის პროცესის, სასჯელის სახით დანიშნული საზოგადოებისათვის სასარგებლო შრომისა და განრიდების სუბიექტების მიერ საზოგადოებისათვის სასარგებლო უსასყიდლო სამუშაოს აღსრულების მნიშვნელობას, და ამ მიზნით გამოთქვამენ სრულ მზადყოფნას, მსჯავრდებულთა დანაშაულის პრევენციისაკენ მიმართული ღონისძიებების განხორციელებითა და დასაქმებით, ხელი შეუწყონ მათ ინტეგრაციას საზოგადოებაში, რეაბილიტაციასა და რესოციალიზაციას.

საქართველოს კანონმდებლობის შესაბამისად, ამ ურთიერთთანამშრომლობის შესახებ მემორანდუმით (შემდგომ - „მემორანდუმი“) თანხმდებიან შემდეგზე:

მუხლი 1. მემორანდუმის მიზანი

1.1 წინამდებარე მემორანდუმის მიზანია საქართველოს იუსტიციის სამინისტროს მმართველობის სფეროში მოქმედი საჯარო სამართლის იურიდიული პირის - დანაშაულის პრევენციის, არასაპატიმრო სასჯელთა აღსრულებისა და პრობაციის ეროვნული სააგენტოს (შემდგომ - „სააგენტო“) ბენეფიციარების რესოციალიზაციისა და რეაბილიტაციის ხელშეწყობა და მერიის შესაბამის სამსახურებში/სკვერებში მსჯავრდებულებისა და განრიდების სუბიექტების დასაქმება, სასჯელის სახით საზოგადოებისათვის სასარგებლო შრომის აღსრულებისა და საზოგადოებისათვის სასარგებლო უსასყიდლო სამუშაოს შესრულებისათვის, საზოგადოებაში მათი სრულყოფილი ინტეგრაციის მიზნით.

მუხლი 2. მემორანდუმის საგანი

წინამდებარე მემორანდუმის საგანია მემორანდუმით გათვალისწინებული მიზნების მისაღწევად მხარეთა თანამშრომლობის პრინციპების, ფორმებისა და უფლება-მოვალეობების განსაზღვრა.

მუხლი 3. თანამშრომლობის პრინციპები და ფორმები

- 3.1. მხარეთა შორის თანამშრომლობა ეფუძნება ურთიერთპატივისცემის, თანასწორობის, კონფიდენციალურობის, პატივისა და ღირსების დაცვის, ანტიდისკრიმინაციული მიდგომისა და სტიგმატიზაციის დაუშვებლობის პრინციპებს.
- 3.2. წინამდებარე მემორანდუმი წარმოადგენს სააგენტოსა და მერიის შესაბამის სამსახურებს შორის მსჯავრდებულებისა და განრიდების სუბიექტების დასაქმების მიზნით შემდგომში დადებული ხელშეკრულებების საფუძველს.
- 3.3. მხარეები გამოხატავენ ნებას, საქართველოს კანონმდებლობის ფარგლებში, მიაწოდონ ერთმანეთს ყველა საჭირო ინფორმაცია სამუშაო პროცესში წამოჭრილი ნებისმიერი სირთულის შესახებ, რომელმაც შეიძლება გავლენა იქონიოს მემორანდუმით გათვალისწინებული მიზნების განხორციელებაზე.
- 3.4. მემორანდუმით გათვალისწინებულ პირთა მონაცემები მხარეთა მიერ მუშავდება კონფიდენციალურობის პრინციპის დაცვით, „პერსონალურ მონაცემთა დაცვის შესახებ“ საქართველოს კანონის შესაბამისად.
- 3.5. წინამდებარე მემორანდუმის გათვალისწინებით, მერია, მისადმი დაქვემდებარებული უწყებებისა და ტერიტორიული ორგანოების მეშვეობით ხელს შეუწყობს საზოგადოებისათვის სასარგებლო შრომისა და განრიდების ნაკისრი პირობების აღსრულების უზრუნველსაყოფად, მსჯავრდებულებს დასაქმების ადგილებით. ამასთან, საზოგადოებისათვის სასარგებლო შრომის აღსრულებისათვის მერია უზრუნველყოფს ქალაქ ფოთში სკვერის გამოყოფას.
- 3.6. წინამდებარე მემორანდუმი წარმოადგენს ჩარჩო დოკუმენტს, რომლის ფარგლებშიც ყველ ცალკეულ შემთხვევაში, მერიის შესაბამის სამსახურსა და სააგენტოს ტერიტორიულ ორგანოს - დანაშაულის პრევენციის, არასაპატიმრო სასჯელთა აღსრულებისა და პრობაციის პრობაციის ბიუროს (შემდგომ - პრობაციის ბიურო) შორის კონკრეტულ მსჯავრდებულთან/განრიდებულთან დაკავშირებით გაფორმებული იქნება ინდივიდუალური ხელშეკრულება, რომელშიც მიეთითება მსჯავრდებულის/განრიდებულის მიერ შესასრულებელი საზოგადოებისათვის სასარგებლო შრომის სახე, მთლიანი ვადა, ყოველდღიური ხანგრძლივობა, სამუშაო ადგილი, დამსაქმებლის დასახელება და მისამართი, აგრეთვე საკითხის გადაწყვეტისათვის მნიშვნელოვანი სხვა გარემოებები.
- 3.7. მხარეები თანხმდებიან, რომ წინამდებარე მემორანდუმის ფარგლებში გაფორმებული ყველა ინდივიდუალური ხელშეკრულება იქნება უსასყიდლო და მერიას/მერიის შესაბამის სამსახურს არ ექნება სააგენტოსათვის ან/და მსჯავრდებულისთვის/განრიდებულისათვის მომსახურების საფასურის გადახდის ვალდებულება.
- 3.7. მხარეები ასევე თანხმდებიან, რომ წინამდებარე მემორანდუმის ფარგლებში მერია/მერიის შესაბამისი სამსახურები პრობაციონერთა და ყოფილ პატიმართა რეაბილიტაცია-

რესოციალიზაციის მიზნით უზრუნველყოფენ დასაქმების ხელშეწყობას, საზოგადოებაში მათი ინტეგრაციისთვის.

3.8. მხარეთა შორის თანამშრომლობა მოიცავს ინფორმაციის გაცვლასა და საჭიროების შემთხვევაში, რეკომენდაციების მიწოდებას, კონსულტაციებს დასაქმების მიზნით.

მუხლი 4. მხარეთა უფლება-მოვალეობები

4.1. სამინისტრო იღებს ვალდებულებას:

4.1.1. სააგენტოს მეშვეობით მერიას წარუდგინოს საზოგადოებისათვის სასარგებლო შრომამისჯილი პირის და განრიდების სუბიექტის შესახებ ინფორმაცია, რაც მოიცავს საზოგადოებისათვის სასარგებლო შრომის სახეს, მთლიან ვადას, ყოველდღიურ ხანგრძლივობასა და სხვა მნიშვნელოვან საკითხებს.

4.1.2. პრობაციის ბიუროს მეშვეობით საზოგადოებისათვის სასარგებლო შრომის შესრულების პერიოდში, ჯეროვანი კონტროლი და აღრიცხვიანობა გაუწიოს დამსაქმებლის მმართველობის სფეროში არსებულ უწყებებში/ორგანიზაციებში დასაქმებულ მსჯავრდებულებს/განრიდების სუბიექტებს.

4.1.3. საჭიროების შემთხვევაში, საკუთარი ხარჯებით, გონივრულ ვადაში მერიის თანამშრომელთათვის ჩაატაროს ტრენინგი.

4.1.4. შეასრულოს კანონმდებლობით განსაზღვრული სხვა ვალდებულებები.

4.2. მერია იღებს ვალდებულებას:

4.3.1. პრობაციის ბიუროს მიმართვის საფუძველზე, შესაძლებლობების ფარგლებში, უზრუნველყოს საზოგადოებისათვის სასარგებლო შრომამისჯილ მსჯავრდებულთა მიერ საზოგადოებისათვის სასარგებლო შრომის აღსრულების და განრიდების სუბიექტების მიერ საზოგადოებისათვის სასარგებლო უსასყიდლო სამუშაოს შესრულების მიზნით, სამუშაო ადგილების გამოყოფა მერიის, მის შესაბამის სამსახურებსა და მუნიციპალიტეტის მიერ დაფუძნებულ იურიდიულ პირებში.

4.3.2. მსჯავრდებულს/განრიდების სუბიექტს მის მმართველობაში არსებულ ობიექტებში შეუქმნას ჯანსაღი და უსაფრთხო სამუშაო პირობები, მათთვის შესაბამისი ინსტრუქტაჟის ჩატარების გზით.

4.3.3. განახორციელოს მსჯავრდებულის/განრიდების სუბიექტის მიერ საზოგადოებისათვის სასარგებლო შრომის ხანგრძლივობის, შესრულებული სამუშაოს მოცულობის აღრიცხვა და აწარმოოს ჩანაწერები პრობაციის ბიუროს მიერ მიწოდებული ფორმით.

4.3.4. საჭიროების შემთხვევაში, მსჯავრდებული/განრიდების სუბიექტი აღჭურვოს სპეციალური სამსახურებრივი სამოსით.

4.3.5. უზრუნველყოს საზოგადოებისათვის სასარგებლო შრომა მისჯილი მსჯავრდებულებისთვის ამ მემორანდუმის ფარგლებში გამოყოფილი სკვერის შესაბამისი აბრით უზრუნველყოფა, სადაც აღნიშნული იქნება მსჯავრდებულების მიერ სკვერის მოვლა/დასუფთავების შესახებ.

მუხლი 5. ცვლილებებისა და დამატებების შეტანის წესი

მემორანდუმში მხარეთა ურთიერთშეთანხმების საფუძველზე შესაძლებელია ცვლილებისა და დამატების შეტანა, რომელიც ფორმდება წერილობით. იგი წარმოადგენს მემორანდუმის განუყოფელ ნაწილს და ძალაში შედის მხარეთა მიერ ხელმოწერის დღიდან.

მუხლი 6. დავის გადაწყვეტის წესი

მხარეები თანხმდებიან, რომ მათ შორის წარმოშობილი ნებისმიერი დავა გადაწყვდება ურთიერთმოლაპარაკების გზით.

მუხლი 7. ფორსმაჟორი

ფორსმაჟორის გამო წინამდებარე მემორანდუმით აღებული ვალდებულებების შეუსრულებლობის ან/და არასრულად შესრულების შესახებ, მხარემ მეორე მხარეს დაუყოვნებლივ უნდა გაუგზავნოს წერილობითი შეტყობინება.

მუხლი 8. სხვა დებულებები

8.1. წინამდებარე მემორანდუმი ძალაში შედის მხარეების მიერ ხელმოწერის დღიდან და მოქმედებს განუსაზღვრელი ვადით.

8.2. წინამდებარე მემორანდუმის მოქმედება შესაძლებელია შეწყდეს მხარეთა შეთანხმებით, ან ერთ-ერთი მხარის ინიციატივით. მემორანდუმის შეწყვეტის ინიციატორი მხარე ვალდებულია, აღნიშნულის შესახებ აცნობოს მეორე მხარეს მემორანდუმის შეწყვეტამდე არაუგვიანეს ერთი თვისა.

8.3. მემორანდუმის მოქმედების შეწყვეტა არ მოქმედებს იმ დასაქმებათა კანონიერებაზე ან/და ხანგრძლივობაზე, რომელიც შეთანხმებულია წინამდებარე მემორანდუმის ფარგლებში. მხარეებმა უნდა განახორციელონ ყველა აუცილებელი მოქმედება მემორანდუმის ფარგლებში უკვე დაწყებული დასაქმების დასასრულებლად.

8.4. მემორანდუმი შედგენილია ქართულ ენაზე, თანაბარი იურიდიული ძალის მქონე ორ ეგზემპლარად და ინახება მხარეებთან.

მუხლი 9. მხარეთა რეკვიზიტები და ხელმოწერა

საქართველოს იუსტიციის სამინისტრო	ქ.ფოთის მუნიციპალიტეტის მერია
ქ. თბილისი, ვახტანგ გორგასლის 24 ^o	ფოთი, დ.აღმაშენებლის ქ.#12



იუსტიციის მინისტრი

რატი ბრეგაძე



ფოთის მუნიციპალიტეტის მერი

გოჩა კურდღელია